

**■ TRIBUNA POLITICA**

# Lescha da taglia e politica agrara

DA MARTIN SCHMID,  
CUSSEGLIER DALS CHANTUNS

L'ultima emna è la cummissiun d'economia e taxas dal cussegl dals chantuns sa radunada per s'occupar danovamain cun la nova proposta per la refurma da taglia per interpresas, dentant era cun la politica agrara 2022. Tuttas duas tematicas han chaschunà discussiuns cuntra-versas.

Primo tar las taglias: Suentar ch'il pieval ha refusà relativ cler la taglia sin interpresas III stat l'aboliziun da questa taglia sbittada en l'exteriur, dentant apprezzada en Svizra, danovamain sin la glista da tractandas dal parlament. L'entrada en materia n'è betg stada dispaivla damai che la Svizra è malgrà il verdict dal pievel anc adina sut squitsch internaziunal. La varianta da far nagut è deplorablmain era nagina varianta verdaivla.

La dumonda e surtut sch'il parlament dastga preschentar al pievel quasi anc ina giada il medem project ch'è vegnì refusà pir dacurt. Or da vista politica e democratica è quai ina procedura problematica ch'enserra gronds ristgs. Cun questa varianta ristgan ins ch'il suveran di ina segunda giada na damai ch'ìls motivs per il na èn anc adina ils medems. La populaziun aveva tenor mia percepciun subjectiva tema da chaschunar uschia sperditas da taglia memia grondas. Ella na vuleva betg ina reduenziun unilateral da las taglias mo per interpresas ed ella n'aveva betg la confidenza en la politica.

Tgi ch'examinescha la proposta preschentada sto bain observar fitg exactmain per betg crair ch'i sa



tractia anc ina giada da la medema proposta. La differenza è talmain pitschna, abstrahà dal fatg ch'ìls supplements d'uffants vegnan ad esser en intgins chantuns in zichel pli auts per uschia gudagnar votantas e votans cun in pitschen «zutger» che n'ha da far nagut cun la refurma da taglia. La votaziun davart la revisiun da la AVS lascha salidar. Plinavant datti pitschnas adattaziuns punctualas sco la renunzia da renconuscher la reduenziun d'agen chapital, magrà ch'i fiss atgnamain stà pli prudent da betg dischavantiar fiscalmain societads finanziadas cun agen chapital. Era sche renunzias da las cumpetenzas finanzialas dals chantuns vegnan vendidas sco «cumpromiss» èsi da remarcar ch'ìls parlaments chantunals avessan già las medemas pussaivladads gia cun la lescha refusada dal suveran.

La finamira è da dumagnar atras il pachet fiscal 17 anc en il decurs da la sessiun da stad per ch'el possia – e quai n'è betg ina sgnocca – sin fundament da la planisaziun dal cussegl federal gia vegnir deliberà da l'assemblea federala en il decurs da la sessiun

d'atun. Evident è sulettain che las reglas fiscalas actualas per societads da holding e da domicil na vegnan betg a cuzzar ditg pli. U che nus abolin ellas sezs ni ch'ellas n'èn betg pli applitgables pervi da las limitaziuns internaziunalas.

Per discussiuns chaliradas ha era la politica agrara procurà l'ultim temp. Per in temp n'ha il timun da l'Uniun purila svizra betg pli prendì part dals discurs cun il cussegl federal. La culpa da quest embargo è stada «la vista generala dal svilup da la politica agrara». Or da l'optica da l'agricultura da muntogna è la politica agrara vertenta e cunzunt la politica agrara 14 per saldo stada cleramain positiva.

La cummissiun dal cussegl dals chantuns na vesa perquai nagin motiv da reinviar il rapport e d'empruvar da volver la roda. Surtut sa tracti da sa preparar per la nova direenziun da la politica agrara 22+. En scadin cas duai vegnir evità da maschadar la politica agrara cun la politica dal commerzi liber. Per mai èsi en scadin cas cler che l'agricultura da muntogna vegna a fruntar cun sias pretenziuns sin gronda simpatia en nosa cummissiun. En il Grischun vegnan producids products d'auta qualitat, l'ecologia è da gronda muntada ed ils manaschis èn innovativs e coopereschan cun il turissem ed èn garants per la colonisaziun decentrala da noss pajais. Quai è effectivamain la giusta situaziun da partenza per savair subsister en in ambient cun novas sfidas. Fact è dentant era ch'ìls purs da la Bassa ch'han in'optica differenta dattan en adina dapli il tun tant tar l'Uniun purila svizra sco a Berna.